

**Isu Pejuang Kemerdekaan: PAS Enggan Terima Memorandum Bantahan  
mStar Online  
September 8, 2011  
Oleh NURUL AIN MOHD HUSSAIN**

**KUALA LUMPUR:** Pimpinan PAS pusat pada Khamis enggan menerima memorandum bantahan daripada Persatuan Bekas Polis Malaysia (PBPM) dan Persatuan Bekas Tentera Malaysia (PBTM) berhubung kenyataan kontroversi Timbalan Presidennya, Mohamad Sabu berhubung isu pejuang sebenar insiden berdarah Bukit Kepong.

Berang dengan tindakan pimpinan PAS pusat tersebut kira-kira 50 anggota kedua-dua persatuan berkenaan berhimpun di hadapan ibu pejabat PAS di Jalan Raja Laut namun pintu pejabat tersebut dikunci dari dalam bagi tidak membenarkan kumpulan berkenaan menyerahkan memorandum tersebut.

Turut menyertai kumpulan itu ialah anggota Persatuan Veteran Tentera Melayu (PVTM) serta beberapa NGO lain, termasuk bekas askar yang pernah bertempur dalam perang menentang tentera komunis sebelum ini.

Menurut seorang kakitangan pejabat PAS, mereka tidak dapat menerima memorandum berkenaan kerana tidak menerima arahan untuk berbuat demikian daripada pemimpin parti berkenaan.

Keengganan pimpinan PAS menerima memorandum berkenaan menyebabkan kumpulan tersebut melaungkan gelaran 'bacul' dan 'penakut' kepada Mohamad yang sedang mengadakan satu sidang akhbar pada waktu itu.

Kira-kira 20 anggota polis turut berkawal di hadapan bangunan tersebut bagi mengelakkan sebarang kejadian tidak diingini.

Selepas berhimpun kira-kira 30 minit kumpulan berkenaan diarahkan bersurai oleh pihak polis kerana mereka tidak mempunyai permit untuk berhimpun.

### **Bukan Hantar Peluru**

Sementara itu, ketika ditemui pemberita, Presiden PBPM, Shafie Bakri berkata, mereka berasa kecewa kerana PAS bertindak demikian.

"Kita cuma orang biasa, persatuan biasa yang hendak hantar surat, bukannya peluru," katanya.

Beliau juga enggan meletakkan memorandum berkenaan di muka pintu ibu pejabat PAS itu dan menegaskan kumpulan tersebut akan kembali berhimpun dengan lebih ramai anggota bagi menunjukkan sentimen penentangan mereka terhadap kenyataan Timbalan Presiden PAS yang didakwa menyeleweng jauh daripada sejarah.

"Apa yang beliau (Mohamad) lakukan telah mengguris hati dan perasaan kami apabila menyatakan bahawa Mat Indera dan tentera komunis merupakan pejuang kebebasan," ujarnya.

Kumpulan tersebut kemudiannya beredar secara aman selepas berhimpun kira-kira 30 minit sambil menyanyikan lagu patriotik, "Inilah Barisan Kita".

Pada 21 Ogos lalu, Mohamad dalam satu ceramah di Tasek Gelugor Pulau Pinang dilaporkan berkata, Mohamad Indera yang terlibat dalam insiden serangan ke atas Balai Polis Bukit Kepong pada 23 Februari 1950, ialah hero sebenar yang memperjuangkan kemerdekaan negara.

Ekoran kenyataan kontroversinya itu, lebih 500 laporan polis telah dibuat sebagai mengecam tindakannya itu.

Hakcipta Terpelihara © 1995-2011 Star Publications (Malaysia) Bhd

Source:

[http://mstar.com.my/berita/cerita.asp?file=/2011/9/8/mstar\\_berita/20110908153143&sec=mstar\\_berita](http://mstar.com.my/berita/cerita.asp?file=/2011/9/8/mstar_berita/20110908153143&sec=mstar_berita)